

孝

經

學

孝經學目錄

明例

孝經脈絡次第說

孝經微言大義略例

陳氏澧說孝經要略

要旨

圖表

孝經今古文各本表

會通

解紛

三經
郊祀宗祀

闕疑

流別

孝經注解傳述人考正

孝經各家撰述要略

附
經注疏各本得失

明例第一 孝經

曹元弼學

孝經脈絡次第說

孝經大例有二曰脈絡曰次第一經一緯皦如釋如其本皆出於首章首章曰先王有至德要道德者愛敬也愛敬及天下謂之至德孝弟是也道者所以行愛敬者也愛敬一人而千萬人說以興愛興敬謂之要道禮樂是也廣至德廣要道章明之曰以順天下至德要道出於天命之性不學而能不慮而知聖人治天下不別立法但因人心所固有者而利導之是以教不肅而成政不嚴而治三才章明之曰民用和

睦上下無怨民愚而不可欺賤而不可犯術馭勢迫
倒行逆施則怨而以詐相遁術窮勢竭而禍亂遽起
惟因人心之所同然順而行之則合敬同愛而上下
安協智同力而災患息君民一體父子相保是謂大
順孝治章明之曰夫孝德之本也教之所由生也德
者愛敬也教者教愛教敬也至德要道元出於孝愛
敬之本由于父子天性因嚴可以教敬因親可以教
愛聖人推愛親敬親之心以愛人敬人使天之所生
地之所養無不被吾愛敬告成功於天祖尊之至而
事天明親之至而事地察不過盡孝之能事聖治章

明之而感應章申述之反是則本實先撥枝葉必傾
悖德悖禮亂臣賊子以私恩小惠要結徒黨遂其逆
節將使生民塗炭積血暴骨災害禍亂莫知所底是
以春秋誅大逆孝經明大順皆以絕惡慢之原立愛
敬之本教自順此生刑自反此作聖治章明之而五
刑章極言之曰孝之始孝之終愛親者不敢惡於人
敬親者不敢慢於人愛親敬親孝之始不敢惡慢於
人以保守天下國家身名者孝之終天子不毀傷天
下諸侯卿大夫不毀傷國家士庶人不毀傷其身文
武之道天下後世爲法反是則幽厲之名百世不改

殷周有道則長秦無道則暴諸侯以下皆然故孝無終始而患不及者未之有天子至庶人五章明之不幸而有不能終始於愛敬之道者則子必爭臣必爭友必爭俾不及於失天下失國家失身名之患諫爭章明之曰夫孝始於事親事孰爲大事親爲大守孰爲大守身爲大不失其身而後能事其親紀孝行章明之事生者易事死者難惟送死可以當大事喪親章特明之曰中於事君聖人所以生天下萬世之人在教孝而所以使人各保其父子以遂其孝者在教忠故資於事父以事君而敬同事君章明之盡忠

匡救君臣一體存亡休戚與同忠焉能勿誨乎諫爭
章互明之曰終於立身孝弟忠順之行立而後可以
爲人君子也者人之成名成身則成親必至立身揚
名而後不敢毀傷者爲真無所毀傷廣揚名章明之
孝始於事親則家治中於事君則天下治終於立身
則萬世賴以治反是則不事親者非孝無親矣不事
君者要君無上矣不立身者非聖無法矣要君非聖
非孝三者相因皆不孝之罪事親事君立身三者備
乃完孝之行故曰夫孝德之本也聖人之德無以加
於孝此孝經之脈絡也首章言孝之始孝之終因陳

天子至庶人行孝終始之事故天子以下五章次之
天子至庶人皆推愛親敬親之心以愛人敬人以保
其祖父所傳之天下國家身體髮膚有慶無患孝道
之大如此非聖人強以教人乃本於乾元坤元繼善
成性天生烝民有物有則所謂道之大原出於天故
三才章次之聖人則天順民因性立教則人人興孝
興仁上下各致其愛敬之實以興利除害相生相養
相保不敢有一人之惡慢以災及其親故孝治章次
之夫如是則四海之內無一物不得其所升中于天
配以父祖仁人事天孝子事親之能事畢故曰君子

務本本立而道生聖人盡其性以盡人之性綏之斯來動之斯和致中和位天地育萬物其所因者本故聖治章次之聖人愛敬天下之極功本於愛親敬親教愛因親教敬因嚴孝之大義既畢乃陳事親守身之節目故紀孝行章次之失其身而能事親者未之聞孝始於守身不孝始於忘身充忘身之極則無惡不爲且不愛其親而愛他人不敬其親而敬他人者包藏禍心悖德悖禮勢必殫殘聖法無父無君爲生民大患聖人愛敬天下所以不得已而用刑故五刑章次之罪莫大於不孝行莫大於孝惟孝故順民如

此其大而爲禮之始聖人以孝弟禮樂爲教禮之大義尊尊親親長長而其所以爲教則躬立爲子爲弟爲臣之極本諸身而徵諸民故廣要道廣至德章次之孝弟忠順之行立則身修而名自立於後世故廣揚名章次之慈愛恭敬安親揚名孝道備矣復陳諫爭之義以結天下國家身名而感應章長言永歎孝弟之至繼以事君章亦事父事兄事君相次而喪親章終焉此孝經之次第也三才章則天因地以順天下以天治人也聖治章因嚴教敬因親教愛以人治人也廣至德章非家至而日見之以己治人也三才

以下三章由己達之天下廣要道以下三章由天下而反之身聖人立言從心所欲左右逢原從容中道脈絡分明而往不息根本盛大而出無窮學者沈潛反覆自覺天良發不可遏一若春陽生乎方寸而和氣塞乎天地間者肫肫焉淵淵焉浩浩焉神而明之存乎其人存乎德行也或曰今之十八章固孔子之舊次歟曰今文相傳無異本古文簡札有複重雜亂劉子改以今文正之不聞先後異序也其文首尾貫串如繫辭中庸豈有後人更定者哉

孝經微言大義略例

凡道之大原出於天孝經以天治人天不變道亦不變故謂孝道爲經

凡天地之性人爲貴古今中外凡題直正當天地之人此心皆同孝經以人治人順是爲人反是則無父無君是禽獸

凡天命之謂性父子之道天性爲孟子性善之說所自出性有五德仁主愛義主敬孝經言德皆愛敬卽五常之德

凡五常本於仁仁本於孝孝弟同體良知良能達之天下謂之至德孝經言至德周禮三德六德皆統之

孝爲人行莫大孝經論行周禮三行六行皆統之

凡性善情亦善孝經喪親章言情情之至正者

凡率性之謂道天性親嚴是謂父子之道君臣兄弟夫婦朋友愛敬之道皆從此起孝經言道卽天下之達道五爲制禮之本

凡五倫統于三綱資于事父以事母資于事父以事君而尊尊之道著以孝事君則忠以敬事長則順而尊尊親親長長之道備中庸言君子之道曰子臣弟友與孝經要道同義

凡修道之謂教因嚴教敬因親教愛開闢以來中國

聖人立教大本在此三代以上中國所以富強治安
皆根本於此六經皆此道而孝經直揭之書五教周
禮十二教皆統之

凡孝經言義卽禮運十義聖治章曰君臣之義義之
最重者

凡孝經不言知見教之可以化民卽知孝經不言信
不言勇孝有終始自強不息卽信卽勇

凡教本乎天率乎性以立道以順民以施政謂之則
謂之法以體言謂之禮以常言謂之經

凡孝道著在言行君子言行王者政教皆本愛親敬

親之心以愛人敬人得乎人心之所同然謂之則
凡孝經治天下之道在順而所以順之者在敬愛立
於敬孝經言不敢卽敬之義

凡孝經之教事親在愛而持以終身弗辱之敬事君
在敬而出以中心惻怛之愛

凡孝經以身教至德要道有諸己而后求諸人孔子
行在孝經所以爲萬世法

凡孝經以名教君臣父子之名正而後有順逆善惡
善名爲善惡名爲惡而後顧名思義人心可正民行
可興

凡孝經事親謹身之目在禮經喪祭記曲禮內則諸篇

凡孝經愛敬之教備在禮十七篇愛敬之政備在周官六典愛敬之義在二戴禮記凡井田封建學校軍賦宗法教農教兵通商考工生人相生相養相保之道皆天子以下愛敬之實事

凡孝經爲六藝之總會以孝經通易而伏羲立教之本明以孝經通詩書而民情大可見王道益燦然分明以孝經通禮而綱紀法度會有樞統有宗法可變道不可變以孝經通春秋而尊君父討亂賊之大義

明邪說誣聖不攻自破以孝經權衡百家如視北辰以正朝夕是非有正異端自息異端之說不同而歸于無父無君則同父子君臣之大義明則百家之毒盡去百家之長皆可用以孝經觀百代興亡而愛敬惡慢之效捷於影響昭若揭日月而行

凡論語言仁極聖人愛敬天下萬世之情與孝經一貫

凡孝經庸德庸行詳述於曾子十篇大義發於中庸微言逮於孟子

陳氏澧東塾讀書記說孝經

鄭康成六藝論云孔子以六藝題目不同指意殊別

恐道離散後世莫知根源故作孝經以總會之

隋書經籍

志亦有此數語其下云明其枝流雖分本萌於孝者也此二句或亦六藝論之語 禮案六藝

論已佚而幸存此數言學者得以知孝經爲道之根源六藝之總會此微言未絕大義未乖者矣

說文卷末載許叔重遺子冲上說文書並上孝經孔氏古文說禮謂孔子教弟子孝弟學文許君以二書並上蓋亦此意惜孝經孔氏古文說竟不傳也

荀慈明對策云漢制使天下誦孝經禮案續漢書百官志司隸校尉假佐二十五人孝經師主監試經諸

州與司隸同此東漢之制也咸豐中有 旨令

歲科試增孝經論正合東漢之制若督學及府廳州縣官試士以此爲重則天下皆誦孝經如東漢時矣司馬溫公云嚮若使之盡通詩書禮樂則中材以下或有所不及今但使之習孝經論語儻能盡期年之功則無不精熟矣此乃業之易習者也然孝經論語其文雖不多而立身治國之道盡在其中就使學者不能踐履亦知天下有周公孔子仁義禮樂其爲益也豈可與一首律詩爲比哉

溫公書儀云子年十五已上能通孝經論語粗

知禮義之方然後冠之

朱子甲寅上封事云臣所讀者不過孝經語孟之書

知南康時示俗文云孝經云用天之道分地之利

本注云謂依時及節耕種田土謹身節用本注云謹身謂不作非違

用不妄以養父母本注云人能行此三句之事則身

耗費安穩此庶人之孝也本注云能行此上四句之事

快樂須如此方能保守父母產業不至破壞乃為孝順若

父母生不能奉養父母亡不能保守便是不孝

之人天所不容地所不載幽為鬼神以上孝經庶人

章正文五句係先聖至聖文宣王所說奉勸民間逐

日持誦依此經解說早晚思惟常切遵守不須更念

佛號佛經無益於身枉費力也朱子上告君下教民

皆以孝經學者勿以朱子有刊誤之作而謂朱子不尊信孝經也

朱子孝經刊誤以仲尼居至未之有也爲一節云夫子曾子問答之言而曾氏門人之所記疑所謂孝經者其本文止如此其下則或者雜引傳記以釋經文濫謂如朱子之言則第一節猶大學章句所謂經一章其下釋經文者猶大學章句所謂傳也雜引傳記者猶中庸章句所謂雜引孔子之言以明之也朱子所疑者章首子曰二字及章末之引詩書與天之經也地之義也云云乃左傳子太叔述子產之言又疑

嚴父莫大於配天非所以爲天下之通訓

語類亦屢有此說

然中庸亦有章首用子曰二字者孟子每章之末引詩書者尤多左傳仲尼曰古也有志克己復禮仁也曰季曰臣聞之出門如賓承事如祭仁之則也此論語孔子告顏淵仲弓者而皆見於左傳則孝經有左傳語不必疑也嚴父莫大於配天與孟子所謂孝子之至莫大乎尊親尊親之至莫大乎以天下養文義正同尤不必疑矣

孟子七篇中多與孝經相發明者孝經曰非先王之法服不敢服非先王之法言不敢道非先王之德行

不敢行孟子曰子服堯之服誦堯之言行堯之行亦
以服言行三者並言之孝經天子章曰刑於四海諸
侯章曰保其社稷卿大夫章曰守其宗廟庶人章曰
謹身孟子曰天子不仁不保四海諸侯不仁不保社
稷卿大夫不仁不保宗廟士庶人不仁不保四體亦
似本於孝經也世俗所謂不孝者五隋其四支不顧
父母之養云云正與謹身節用以養父母相反亦可
以爲孝經之反證也司馬溫公家範引孝經五刑之
屬三千兩罪莫大於不孝其下
亦引孟子所言五不孝孟子外書四篇其一篇名
曰孝經蓋論說孝經之語趙邵卿題辭雖以外篇爲
後世依託然亦必
出於孟氏之徒也

陶淵明有五孝傳或疑後人依託禮謂不必疑也蓋
陶公於家庭鄉里以孝經爲教稱引故實以證之故
其庶人孝傳贊云嗟爾庶庶鑒茲前式司馬溫公家
範錄孝經居則致其敬養則致其樂病則致其憂喪
則致其哀祭則致其嚴五句每句各引經史以證之
蓋孝經一篇皆論以孝順天下之大道惟此五句爲
孝之條目故加以引證亦所謂鑒茲前式也四學紀聞云彭
忠肅公以致敬致樂致憂致哀致嚴致哀集格言爲五
致錄司馬溫公家範亦以五致類事忠肅之書本此
禮案朱子孝經刊誤卷末云欲撮取他書之言可發
明孝經之旨者別爲外傳黃直卿亦輯錄諸經傳言
孝者爲孝經本旨二十四
卷見直齋書錄解題卷三

孝經大義在天子諸侯卿大夫士皆保其天下國家其祖考基緒不絕其子孫爵祿不替庶人謹身節用爲下不亂如此則天下世世太平安樂而惟孝之一字可以臻此亡友桂星垣嘗與澧論此云論語第二章言孝弟則不犯上作亂卽孝經所謂至德要道以順天下斯言得之矣

四庫全書總目謂孝經與禮記爲近又以魏文侯有孝經傳則孝經爲七十子之遺書此考據最確無疑義矣仲尼居曾子侍與孔子閒居子夏侍仲尼燕居子張子貢言游侍文法正同

大戴禮主言篇孔子閒居曾子侍文法亦同

其書言孝道乃天下之大本中庸立天下之大本故

自爲一經此經是孔子之言其筆之於書者但可謂

之述不可謂之作故鄭君以爲孔子作也史記仲尼弟子列傳

則云曾子作黃東發日鈔以孝經爲首而論語孟子次之

以讀經者當先讀此經也王儉七志以孝經居首見經典釋文序錄

經解云孔子曰安上治民莫善於禮此之謂也此引

孝經也喪服四制云資於事父以事君而敬同毀不

滅性不以死傷生喪不過三年資於事父以事母而

愛同大戴禮本命同皆孝經之語

孝經鄭注諸書所引者雖多然無以定爲康成注惟

郊特牲正義引王肅難鄭云孝經注云社后土也此係

校勘記所稱句龍為后土鄭既云社后土則句龍也

是鄭自相違反鄭以社為五土之神句龍配之故王肅以為自相違反也此王肅

所難是康成注明矣劉光伯謂肅無攻擊孝經鄭注

者殆未詳考耶劉說見孝經序疏獨案孝經序疏引此說係劉知幾語非光伯也此文

偶誤當更正

要旨第二 孝經

曹元弼學

子曰吾志在春秋行在孝經

中庸曰唯天下至誠爲能經論天下之大經立天下之大本鄭氏曰大經謂六藝而指春秋也大本孝經也

史記仲尼弟子列傳曰孔子以曾參爲能通孝道故授之業作孝經

陶淵明五孝傳曰至德要道莫大於孝是以曾參受而書之游夏之徒常咨稟焉

漢書藝文志曰孝經者孔子爲曾子陳孝道也夫孝

天之經地之義民之行也舉大者言故曰孝經

白虎通曰孝經者制作禮樂仁之本

鄭氏六藝論曰孔子以六藝題目不同指意殊別恐道離散後世莫知根源故作孝經以總會之又孝經序曰孝經者三才之經緯五行之綱紀孝爲百行之首經者不易之稱

黃氏道周曰孝經者道德之淵源治化之綱領也六經之本皆出孝經而小戴禮記四十有九篇大戴禮記三十有六篇皆爲孝經疏義蓋當時師偃商參之徒習觀夫子之行事誦其遺言尊聞行知萃爲禮論

而其至要所在備於孝經觀戴記所稱君子之教也
及送終時思之類多釋孝經者蓋孝爲教本禮所由
生語孝必本敬本敬則禮從此起

阮氏元曰春秋以帝王大法治之於已事之後孝經
以帝王大道順之於未事之前皆所以維持君臣安
輯邦家者也君臣之道立上下之分定於是乎聚天
下之士庶人而屬之君卿大夫聚天下之君卿大夫
而屬之天子上下相安君臣不亂則世無禍患民無
傷危矣卽如百乘之家不敢上僭千乘千乘之國不
敢上僭萬乘則天下永安矣且千乘之國不降爲百

乘百乘之家不降爲庶人則天下更永安矣論語曰其爲人也孝弟而好犯上者鮮矣不好犯上而好作亂者未之有也君子務本本立而道生孝弟也者其爲仁之本與論語此章卽孝經之義也不孝則不仁不仁則犯上作亂無父無君天下亂兆民危矣春秋所以誅亂臣賊子者卽此義也孟子曰何必曰利亦有仁義而已矣上下交征利千乘之國百乘之家皆弑其君不奪不厭此首章亦卽孝經之義孔孟正傳在此戰國以後縱橫兼并秦祚不永由於不仁不仁本於不孝故至於此也又曰論語次章有子之語蓋

兼乎孝經春秋之義孔子之道在於孝經孝經取天子諸侯卿大夫士庶人最重之一事順其道而布之天下封建以固君臣以嚴守其髮膚保其祭祀永無奔亡弑奪之禍卽有子所云孝弟之人不犯上不作亂也使天下庶人士大夫卿諸侯人人皆不敢犯上作亂則天下永治也惟其不孝不弟不能如孝經之順道而逆行之是以子弑父臣弑君亡絕奔走不保宗廟社稷是以孔子作春秋明王道制叛亂明褒貶春秋論之於已事之後孝經明之於未事之先其間所以相通之故則有子此章實通徹本原之論

曹元弼述孝篇曰天地之大德曰生生人者天地也
父母也天地父母能全而生之於始而不能使各全
其生於終聖人者代天地爲民父母以生人者也故
曰產萬物者聖聖之言生也聖人將爲天地生人必
通乎生民之本而順行之故聖人能以天下爲一家
以中國爲一人者非他順其性而已性者生也親生
之膝下是謂天性惟親生之故其性爲親而卽謂生
我者爲親孩提之童無不知愛其親也親則必嚴孩
提之童其父母之教令則從非其父母不從也父母
之顏色稍不悅則懼非其父母不懼也是嚴出於親

親者天性嚴者亦天性也親嚴其親是之謂孝是孝者性也性者立教之本也水之性流掘地而注之可以達於海火之性烈鑽燧而取之可以燎於原使人而本無性也者人之性而本不親嚴其父母也者則悖逆詐僞爭奪相殺固其所而聖人將無所施其教今人之性既親嚴其父母若是則順而推之可以無所不親無所不嚴無所不親之謂愛無所不嚴之謂敬試觀孩提愛親少長卽知敬兄由父兄而推之凡在天屬無不親也其尊長無不嚴也是卽率性而順行之親嚴可以教愛敬之明效也故曰君子務本本

立而道生孝弟也者其爲仁之本與又曰親親仁也敬長義也仁義禮智之端擴而充之若火之始然泉之始達苟能充之足以保四海矣苟不充之則不足以事父母何也人少則慕父母者性也及其長而好色也妻子也仕也嗜欲攻取天性日漓親者疏而嚴者忽矣何怪乎事君不忠誤國殃民犯上作亂覆家亡身以災及其親乎卽或本心無他而不達於道以爲吾親則愛之非吾親則不愛吾親則敬之非吾親則不敬不敬則慢不愛則惡惡人者人亦惡之慢人者人亦慢之居上則亡爲下則刑在醜則兵毀其身

危其親雖日用三牲之養其得爲孝乎若此者非無性也無教也無教則逆其性逆其性則失其生上古聖人有生人之大仁知性之大知知人之相生必由於相愛相敬而相愛相敬之端出於愛親敬親愛親敬親之道必極於無所不愛無所不敬使天下之人無不愛吾親敬吾親確然見因性立教之可以化民也推其至孝之德卓然先行博愛敬讓之道而天下之人翕然戴之以爲君師於是則天明因地義順人性正夫婦篤父子而孝本立矣序同父者爲昆弟而弟道行矣因而上治祖禰下治子孫旁治宗族而親

親之義備矣博求仁聖賢人建諸侯立大夫以治水
火金木土穀之事富以厚民生教以正民德司牧師
保勿使失性勿使過度上下相安君臣不亂而尊尊
之道著矣聖法立王事修民功興則有同講聖法同
力王事同卽民功者謂之朋友而民相任信矣三綱
旣立五倫旣備天下貴者治賤尊者畜卑長者字幼
而民始得以相生且賤者統於貴卑者統於尊幼者
統於長而民不得以相殺於是教以孝以敬天下之
爲父者而子說教以弟以敬天下之爲兄者而弟說
教以臣以敬天下之爲君者而臣說子說則孝孝則

親愛弟說則弟弟則禮順臣說則忠忠則居官理治
且愛親者不敢惡於人敬親者不敢慢於人天子愛
敬四海之內則得萬國之歡心以事其先王諸侯愛
敬一國之人則得百姓之歡心以事其先君卿大夫
士庶人愛敬其家則得人之歡心以事其親自上至
下皆兢兢焉爲子臣弟少之事雖天子必有父必有
兄不敢驕溢非法以取亂亡是以天下和平兆民乂
安重社稷嚴宗廟守祭祀保體膚禮教興行刑措不
用集天下和睦之氣升之天祖尊之至而事天明親
之至而事地察大孝尊親嚴父配天普天率土各以

其職生民之本盡死生之義備是謂大順大順者順其性也夫人藏其心不可測度也凡有血氣皆有爭心知者詐愚勇者威怯強者陵弱眾者暴寡泯泯棼棼散無友紀至難治也而聖人能爲之建極錫福達禮定分用人之知去其詐用人之勇去其怒用人之仁去其貪尙辭讓去爭奪一道德同風俗者亦順之而已矣孟子曰天下之言性也以利爲本利者順也禹之行水也行其所無事也教不肅而成政不嚴而治何事之有蓋人之性莫不愛親敬親故可導之以愛人敬人所謂順也非強之使愛人敬人乃以各遂

其愛親敬親所謂孝也人之相與也譬如舟車然相濟達也人非人不濟馬非馬不走水非水不流不仁愛則不能羣不能羣則養不足懷於人者人亦懷之出乎爾者反乎爾者故古之爲政愛人爲大不能愛人不能有其身傷其身卽傷其親故烹熟羶薌嘗而薦之非孝也養也養可能也敬爲難敬可能也安爲難安可能也卒爲難君子之所謂孝者愛人以愛其身愛其身以愛其親生則親安之祭則鬼享之親沒而名立是故有弗言言思可道有弗行行思可樂將爲善思貽父母令名必果是故居處必莊事君必忠

莅官必敬朋友必信戰陳必勇是故父之齒隨行兄
之齒雁行朋友不相踰又能敬親之朋友又能帥朋
友以助敬也是故愛人不親反其仁禮人不答反其
敬有終身之憂無一朝之患是故克己復禮天下歸
仁出門如賓承事如祭己所不欲勿施於人在邦在
家和睦無怨是故天子以德教光於四海爲孝諸侯
以保社稷和人民爲孝卿大夫以守宗廟爲孝士以
守祭祀爲孝庶人以謹身爲孝地以平天以成封建
以固井田以均軍賦以出學校以修人才以多官方
以飭禮俗以成民氣以樂冠昏以時喪祭以嚴朝聘

以尊處則有備出則有威天子守在四夷諸侯守在
四鄰而天下莫敢有越厥志是故天子以天下養天
子之祭也與天下樂之諸侯之祭也與境內樂之卿
大夫士庶人之祭也與宗族外姻朋友樂之是故天
子有田以處其子孫諸侯有國以處其子孫大夫有
采以處其子孫士食舊德之名氏農服先疇之畎畝
商修族世之所鬻工用高曾之規矩其鬼神歆其禋
祀其民人享其土利是故上好仁而下好義事有終
而財不匱上之使下如父兄之畜子弟耳目之役手
足下之事上如子弟之衛父兄手足之捍頭目開誠

心布公道集眾思廣忠益爲天下得人以定天下之業以斷天下之疑四方有患必先知之至明也作內政寄軍令明恥教戰信賞必罰將帥協和少長有禮說以使民民忘其死無事則順治有事則無敵至強也躬行節儉爲天下先務財訓農通商惠工地無餘利人無餘力家給人足養生喪死無憾至富也備物致用立成器以爲天下利知者創物能者世守博師萬物精益求精黃帝用蚩尤之五兵武王收肅慎之楛矢通其變神其化至巧也天下卽有卒然大患而上下相親人心固結合天下之謀以爲謀何詐之不

破合天下之力以爲力何強之不服天下人人出其財何用之不足天下人人竭其巧何器之不利天子勞心以拯生民之災庶人效死以急君父之難九年之水七年之旱不能殺鬼方之師昆夷之患不能病是故勞勤心力耳目而不必爲己節用水火財物而不必藏於己人不獨親其親不獨子其子老有所終壯有所用幼有所長窮民有所養男有分女有歸天地位萬物育矣此順之實也孝之至也故曰人之行莫大於孝聖人之德無以加於孝蓋聖人者爲天地生人者也人非父母不生亦非君不生何也爪牙不

足以供嗜欲趨走不足以避利害無毛羽以禦寒暑
苟無君焉爲之興利除患養欲給求人之類必滅欲
旣得矣飲食則有訟訟則有眾起人人有賊人自利
之心橫行無忌之勢苟無君焉爲之區處條理勞來
鎮撫人之類亦必滅故君者生人之大者也天下一
日無君則猛虎長蛇人立而搏噬上下不交而天下
無邦非無邦也原野厭人之肉川谷流人之血邦無
人也聖人取類以正名而謂君爲父母謂民爲赤子
赤子離父母而能生者未之有也故曰父者子之天
也君者臣之天也聖人作爲父子君臣以爲紀綱所

以生人也故孝子事君必忠君臣之義與父子終始
相維持天下君君臣臣而後人人得保其父子上下
各思永保其父子而後爲君盡君道爲臣盡臣道君
臣父子各盡其道則天下相愛相敬以相生養保全
永無奔亡篡奪生民塗炭之禍是之謂孝治夫天下
至大也治天下至難也以一孝順之而千萬人之心
如一心以千萬人之性本一性也能盡其性卽能盡
人之性故謂之至德要道三皇五帝禹湯文武成王
周公未有不由此者孔子兼包其盛德以爲孝經而
仁覆萬世矣

開宗明義章

先王有至德要道以順天下

天降下民作之君作之師孔子論孝道必稱先王卽
春秋發首書王之義以上治下以聖治愚以祖宗訓
孫子一出言而法祖尊王之義昭若揭日月而行萬
世彝倫於是敘焉此聖人所以爲人倫之至也至德
要道天地之經而民是則之聖人先得人心之所同
然耳有者有諸己順者因其固有而利導之 鄭氏
曰至德孝弟也要道禮樂也按孩提之童無不知愛
其親及其長也無不知敬其兄孝則必弟孝弟皆須

禮以行之樂與禮同體孟子曰仁之實事親是也義之實從兄是也禮之實節文斯二者樂之實樂斯二者傳曰孝禮之始也大本謂之孝達道謂之禮禮之大義尊尊也親親也長長也人人親其親長其長而天下平故民用和睦上下無怨 陸賈新語曰有至德要道以順天下言德行而其下順之矣 黃氏曰順天下者順其心而已天下之心順則天下順矣又曰至德要道本皆生於天因天所命以誘其民非有強於民也

據三才章義

夫子見世之立教者不反其本將

以天治之故發端於此 阮氏曰孔子志在春秋行

在孝經其稱至德要道之於天下也不曰治天下不
曰平天下但曰順天下順之時義大矣哉孝經順字
凡十見順與逆相反孝經之所以推孝弟以治天下
者順而已矣故曰先王有至德要道以順天下民用
和睦上下無怨又曰夫孝天之經也地之義也民之
行也天地之經而民是則之則天之明因地之利以
順天下又曰教民禮順莫善於悌又曰非至德其孰
能順民如此其大者乎是以卿大夫士本孝弟忠敬
以立身處世故能保其祿位守其宗廟反是則犯上
作亂身亡祀絕春秋之權所以制天下者順逆閒耳

魯臧齊慶皆逆者也此非但孔子之恒言也列國賢卿大夫莫不以順逆二字爲至要是以春秋三傳國語之稱順字者最多皆孔子孝經之義也不第此也易之坤爲順也易之稱順者最多亦孔子孝經春秋之義也詩之稱順者最多亦孔子孝經春秋之義也禮之稱順者最多亦孔子孝經春秋之義也聖人治天下萬世不別立法術但以天下人情順逆敘而行之而已故孔子但曰至德要道以順天下也

民用和睦上下無怨

先王之治務在和睦無怨堯典九族旣睦協和萬邦

黎民於變時雍堯之舉舜克諧以孝周公嚴父配天
四方民大和會皆以孝順天下和睦無怨之事天下
治亂視乎人心聚散聚則治散則亂聚則強散則弱
聚則富散則貧聚則知散則愚和睦無怨則聚怨而
不和則散先王因人心之固有導之相愛相敬而天
下如一家中國如一人各竭其聰明材力以相生相
養相保莫大災患無不弭卒莫大功業無不興立是
以聖王在上不言富而天下莫富焉不言強而天下
莫強焉其所因者本也

夫孝德之本也教之所由生也

鄭氏曰人之行莫大於孝故爲德本 黃氏曰本者性也教者道也本立則道生道生則教立先王以孝治天下本諸身而徵諸民禮樂教化於是出焉

身體髮膚兩節

鄭氏說以祭義曰父母全而生之己當全而歸之祭義

論孝語皆見曾子曾子十篇及哀公問篇皆與孝經相表裏學者當合讀之

黃氏曰教

本於孝孝根於敬敬身以敬親敬親以敬天不敢毀傷敬之至也爲天子不毀傷天下爲諸侯大夫不毀傷家國爲士庶不毀傷其身持之以嚴守之以順存之以敬行之以敏無怨於天下而求之於身然後其

身見愛敬於天下身見愛敬於天下則天下亦愛敬其親矣故立教者終始於此也又曰毀傷者何謂也曰暴棄之謂也 阮氏福曰孔子爲弟子講學日以不敢二字爲義孝經十八章自天子至庶人凡言不敢者九曾子謹守孔子之訓故曾子十篇凡言不敢者十有八論語曾子曰戰戰兢兢如臨深淵如履薄冰而今而後吾知免夫卽不敢毀傷之義 北史蘇綽戒子曰讀孝經一卷足以立身治國 案不敢毀傷守身以事親也立身行道成身以成親也孝以不毀爲始揚名爲終則非法不言非道不行一舉足不

敢忘父母一出言不敢忘父母居上不敢驕爲下不敢亂在醜不敢爭所求乎子以事父所求乎臣以事君所求乎弟以事兄所求乎朋友先施之不敢不盡愛日以學及時以行不敢不力教人不敢不誠莅官不敢不敬戰陳不敢不勇君父之憂生民之患萬世之名教綱常四海之內兄弟之顛連而無告者之身家性命不敢不引爲己任如此爲孝則始乎爲士終乎爲聖人天子至庶人皆如此爲孝則上下各隨其分以盡其愛敬內順治而外無敵矣 又案孝經之義推愛親敬親之心以極於愛敬天下天下國家之

本在身身受於親敢不敬乎孝子之事親有窮而事親之心無窮身沒而名立則身不沒親亦不沒天之所生地之所養無人爲大名存則身存身存則親與生我之天養我之地俱存故曰仁人事親如事天事天如事親孝子成身人受天地之中以生其形題直正當天地立德立功立言則與天地參故身曰立萬物皆備於我盡性踐形曰可極天下之明耳可極天下之聰盡其性以盡人之性則親親之仁敬長之義達之天下忠信篤敬行乎蠻貊故道曰行聖人愛敬天下之心無窮必使萬世之人永被其愛敬言爲世

法動爲世道一舉其名而三綱五常繫焉故性善必
稱堯舜而人心皆有仲尼名存則道存道存則萬世
之天下無弱不可強無亂不可治天見其明地見其
光日月可掩食而不可損其明夫是之謂揚名 又
案聖賢學問帝王事業皆基於不敢不敢之心以事
天則小心翼翼也以事君則夙夜匪懈也以治民則
小人難保往盡乃心無康好逸豫也以治軍則臨事
而懼好謀而成日討國人日討軍實而申儆之也世
道衰微人心思亂敢於忘親敢於背君敢於棄身敢
於縱欲敢於廢弛暴棄而生民之禍亟矣聖賢之教

仁爲己任死而後已一息尙存不敢少懈故自天子至庶人皆當孝有終始中庸致中和之功始於戒愼恐懼周易成旣濟之治由於自強不息其義一也

夫孝始於事親節

黃氏曰始於事親道在於家中於事君道在天下終於立身道在百世爲人子而道不著於家爲人臣而道不著於天下身物而道不著於百世則是未嘗有身也未嘗有身則是未嘗有親也天子之事天亦猶是矣詩曰我其夙夜畏天之威于時保之保身之與保天下其義一也 案孝經言孝而切切以事君爲

訓曰中於事君曰夙夜匪懈以事一人曰資於事父
以事君而敬同曰君取其敬曰以孝事君則忠曰父
子之道天性也君臣之義也曰爲下不亂曰要君者
無上曰敬其君則臣說曰教以臣所以敬天下之爲
人君者曰事親孝故忠可移於君曰當不義則臣不
可以不爭於君而結以事君章蓋君臣者人治之大
天下一日無君則弱肉強食爭奪相殺生民莫得保
其父子故孝經大義在天子至庶人各盡其愛敬君
明臣忠上仁下義以各保其祖父所傳之天下國家
身體髮膚如此則君君臣臣父父子子而天下大治

故孝子事君必忠孝弟之人不好犯上作亂爲仁天下之本所謂聖法者如此聖人之所以爲聖人以其莫安萬世之父子君臣也亂臣賊子欲致難於君父必先殫殘聖法是以往者大慝未作之先黜周王魯素王改制之誣說先已簀鼓鼎沸豈知春秋討亂賊孝經明君臣父子大義聖人至教自相表裏炳如日星且孝經言以孝順天下之道必推本先王嚴父配天特稱后稷文王周公中庸述孝經春秋之義曰非天子不議禮不制度不考文曰吾學周禮今用之吾從周曰憲章文武尊王大義所以立人倫之極而維

天地之經布在方策豈奸逆所能誣特風俗日非人心好亡惡定凶德悖禮之說至今流毒未已不勝爲入井赤子憂耳然則如之何而可曰君子反經而已矣聚百順以事君親明聖法以息邪暴而已矣又案事親事君立身三事相維要君非聖非孝三禍相因不孝不弟則本心已死何惡不爲事君不忠則誤國殃民爲蠻夷寇賊莠民邪說之先驅聖道不明則是非無正而無父無君橫行無忌撥亂反正匹夫之賤以天下爲己責在家則敦行孝弟無忝所生出則竭至忠以濟國本博學以爲政處則守死善道立言

誨人扶植名教發人天良禦災捍患庶有萬一之助乎

大雅云無念爾祖聿脩厥德

鄭氏曰雅者正也方始發章以正爲始案此卽春秋大始正本之義孔子尊周憲章文武周以文王爲大祖禮樂法度所自出故春秋元年春王正月傳曰王者孰謂謂文王也孝經首章引文王之詩以證孝德故曰文王旣沒文不在茲乎

天子章

愛親者不敢惡於人敬親者不敢慢於人

案愛敬二字爲孝經之大義六經之綱領六經皆愛人敬人之道而愛人敬人出於愛親敬親愛親敬親孝之始不敢惡慢於人孝之終禹思天下有溺者由己溺之稷思天下有飢者由己飢之四海之內有一物不得其所卽天子惡慢之四境之內有一人不得其所卽諸侯惡慢之推之卿大夫士庶人於官守職業有一未盡卽惡慢也卽孝無終始將使惠及其身以及其親也如此爲孝敢不敬乎孝經之義自天子至庶人自有生至沒身終始於敬以盡其愛而已愛敬非有二義有惻怛護惜之心必有慎重敦勉之意

父母之於子愛之至也惟其至愛故扶持保抱顧復拊畜心誠求之不知勞瘁如執玉如奉盈所謂敬也反而思之愛敬可知矣擴而充之愛敬無窮矣阮

氏釋敬曰古聖人造一字必有一字之本義本義最

精確無弊敬字从苟从支苟篆文作苟

音亟

非苟

音狗也

苟卽敬也加支以明擊敕之義也警从敬得聲得義故釋名曰敬警也恆自肅警也此訓最先最確蓋敬者言終日常自肅警不敢怠逸放縱也故周書諡法解曰夙夜警戒曰敬虞翻易逸象曰乾爲敬易曰君子終日乾乾夕惕若厲書曰節性惟日其邁日邁者

日乾乾也周書以無逸名篇國語敬姜論勞逸之義爲千古至言孔子歎之此敬姜之所以爲敬也敬字古訓以肅警無逸爲義凡服官之人讀書之士當終身奉之案愛立於敬孝經言不敢卽敬字之義愛親者不敢惡於人敬親者不敢慢於人五孝所同而天子者立愛敬之極者也故首發之

愛敬盡於事親而德教加於百姓刑于四海蓋天子之孝也

黃氏曰天子者立天之心立天之心則以天視其親以天下視其身以天視親以天下視身則惡慢之端

無繇而至也 案天子以天下爲體惟天惟祖宗全付有家百姓有過在予一人四方有敗必先知之凡養民理財用人治兵周官六典中庸九經皆天子德教之實德者愛敬也教者教愛教敬也必使百姓四海人人被其愛敬人人愛親敬親以相愛相敬足食足兵無敵順治而後全受於天祖者爲無所毀傷而後一人有慶無患否則秦隋之暴固惡慢周末之衰亦惡慢矣天子者以一人之心力庇萬萬生靈之家性命者也故孝經言治天下之道在順而所以順之者在敬卽易乾坤之義終日乾乾自強不息所以

萬國咸寧保合大和君健而天下順也 又案孟子
言天子不仁不保四海諸侯不仁不保社稷云云正
發明五孝之義所謂孝無終始患及其身也孝經於
諸侯以下皆著然後能保守之文見反是卽不能保
守於天子獨不然者諸侯以下之不保或由於上之
削黜天子則至尊無上當時王室衰微天下乖戾無
君君之心聖人志在尊王故總著其義於後而深沒
其文於此所以辨上下定民志卽春秋書王以制叛
亂之意且引書甫刑特見刑字有奉天子誅亂賊之
義所謂春秋作而亂賊懼春秋天子之事於此見矣

諸侯章

在上不驕節

鄭氏曰費用約儉謂之制節慎行禮法謂之謹度無
禮爲驕奢泰爲溢 元氏潛曰貴不與驕期而驕自
至富不與侈期而侈自來故戒之 漢敕曰親親之
恩莫重於孝尊尊之義莫大於忠故諸侯在位不驕
以致孝道制節謹度以翼天子然後富貴不離於身
而社稷可保 說苑敬慎篇曰高上尊賢無以驕人
聰明聖智無以窮人資給捷速無以先人剛毅勇猛
無以勝人不知則問不能則學雖知必質然後辨之

雖能必讓然後爲之故士雖聰明聖智自守以愚功
被天下自守以謙勇力距世自守以怯此所謂高而
不危滿而不溢者也 呂氏春秋說楚雞父之敗曰
凡持國大上知始其次知中其次知終三者不能國
必危身必窮孝經曰高而不危所以長守貴也滿而
不溢所以長守富也富貴不離其身然後能保其社
稷而和其民人楚不能之也阮氏福曰此可見孔子
以春秋孝經相輔爲教之意如知孝經不危不溢保
和之義則無雞父之戰不保之危矣凡春秋二百數
十年中諸侯卿大夫士之不保社稷祭祀祿位者皆

可以此推之 案楚之敗敗於吳實敗於囊瓦爲政貪恠無藝讒慝宏多綱紀廢弛自攜其民內政不修則輕敵固亡畏敵亦亡國家閒暇及是時明其政刑雖大國必畏之文王卑服卽康功田功不敢盤於遊田而伐昆夷齊桓公作內政而霸諸侯衛文公大布之衣大帛之冠務財訓農通商惠工敬教勸學授方任能而克邢狄越王句踐早朝晏罷生聚教訓而沼吳易亡爲存轉弱爲强未有不不自不驕不溢始者傳曰君子有大道必忠信以得之驕泰以失之若不能實事求是勤民恤功整飭吏治固結人心備豫兵食

而徒爲緩敵苟安之計則敵見我之無志無用必吞噬無餘而後已六國之滅於秦職是故也富貴社稷民人之保與不保不視乎敵勢之強弱邦交之善否而視乎人君敬怠義欲之一心吏治之善惡君心之敬怠轉移之民生之肥瘠君心之義欲消息之敬勝怠者吉怠勝敬者滅義勝欲者從欲勝義者凶凡事不强則枉不敬則弗正枉者廢滅敬者萬世在上不驕敬勝怠也制節謹度義勝欲也戰戰兢兢自強不枉然後能保其富貴以事其先君聖人非教在上者私其富貴也有天下有國者之富貴萬萬生靈之身

家性命繫焉故鄭人有棟折榱崩之懼幽詩有覆巢破卵之憂君民一體也

詩云戰戰兢兢如臨深淵如履薄冰

鄭氏曰義取爲君恆須戒慎 阮氏福曰孔曾之學皆主戒懼故曾子立事篇曰君子取利思辱見惡思詬嗜欲思恥忿怒思患君子終身守此戰戰也又曰昔者天子日旦思其四海之內戰戰惟恐不能久也諸侯日旦思其四封之內戰戰惟恐失損之也大夫士日旦思其官戰戰惟恐不能勝也庶人日旦思其事戰戰惟恐刑罰之至也是故臨事而栗者鮮不濟

矣孝經十八章曾子十篇皆無泰然自得氣象論語
曾子有疾召門弟子曰啟子足啟子手詩云戰戰兢兢
如臨深淵如履薄冰而今而後吾知免夫是曾子
一生皆守孝經戰戰兢兢之大義以至於沒世也

卿大夫章

非先王之法服不敢服非先王之法言不敢道
非先王之德行不敢行

孟子準此文以爲訓曰服堯之服誦堯之言行堯之
行先儒謂聖賢之教皆以服在言行之先蓋服之不
衷則言必不忠信行必不篤敬中庸修身亦先以齋

明盛服都人士之狐裘黃黃所以出言有章行歸於周也 案先王制禮因民生日用不可離之事而爲之節文以達其愛敬之心人受天地之中肖天地之貌聖人因其適體之用而制之法使超然異於毛羽之禽獸而有以自好慎行其身因以敦典秩禮表德定分故古者深衣有制度以應規矩繩權衡規矩取其無私繩取其直權衡取其平可以爲文可以爲武禮始於冠服備而後容體正顏色齊辭令順爲行禮之本三加彌尊諭其志以進其德皆制之於外以安其內使惰慢邪僻之氣不設於身體日遷善而不自

知也世之衰也以天地之性最貴可聖可賢之身而甘爲惰游不齒之服以君父生成涵濡中國數千年來禮俗教化可忠可孝之身而忍爲壞法亂紀之服陷溺人心敗壞風俗毀傷其身災及其親不法之害未知所底正經興民激其廉恥動其天良俾違邪歸正去逆效順是在卿大夫之法言德行 又案禮士相見經曰與君言言使臣與大人言言事君與老者言言使弟子與幼者言言孝弟於父兄與眾言言忠信慈祥與居官者言言忠信是謂法言冠義曰成人之者將責成人禮焉也責成人禮焉者將責爲人子

爲人弟爲人臣爲人少者之禮行焉將責四者之行
於人其禮可不重與故孝弟忠順之行立而後可以
爲人可以爲人而後可以治人也衛將軍文子篇孔
子曰孝德之始也弟德之序也信德之厚也忠德之
正也參也中夫四德者矣是謂德行 又案春秋時
卿大夫尙多法言德行故文武之道未墜於地至戰
國時則事君無義進退無禮言則非先王之道邪說
淫辭深中心毒徧天下賊民興喪無日矣卿大夫
非法不言非道不行而後能格君心之非正人心之
邪諸葛之公誠司馬之忠信朱子之誠正得之矣

然後能守其宗廟

阮氏曰孝經卿大夫之孝以保守其家之宗廟祭祀爲孝如此爲孝則不敢作亂則不敢不忠不仁不義不慈齊之慶氏魯之臧氏皆叛於孝經者也儒者之道未有不以祖父廟祀爲首務者也曾子無廟祀而啟其手足亦此道也

士章

資於事父以事母而愛同資於事父以事君而敬同

劉氏璣曰父情天屬尊無所屈 案天無二日土無

二王家無二主尊無二上天之生物使之一本子者
父之子母統於父資於事父以事母而愛同夫爲妻
綱故父爲子綱父者子之天君者臣之天資於事父
以事君而敬同故君爲臣綱三綱者人倫之本愛敬
之原凡民莫不由之而知其義者士也故制禮自士
始士可不以名教綱常爲己任乎

故以孝事君則忠以敬事長則順

鄭氏曰移事父孝以事於君則爲忠矣移事兄敬以
事於長則爲順矣 舊說云入仕本欲安親非貪榮
貴也若用安親之心則爲忠也若用貪榮之心則非

忠也嚴植之曰上云君父敬同則忠孝不得有異故以至孝之心事君必忠也 案以安親之心事君則知君民一體休戚相同正色立朝竭忠盡智公家之利知無不爲危急存亡有死無二若用貪榮之心則孟子所謂懷利以事君者背君親而爲不義敗國殄民惟利是圖行同狗彘勢所必至矣

然後能保其祿位

君子之於祿位非其道則祿之以天下弗顧也由其道則一命之榮皆君父之恩不敢失墜孟子曰惟士無田則亦不祭士之失位猶諸侯之失國家此孝經

之義也蓋不義而得祿位忝所生也不義而失祿位亦忝所生也君子之於祿位得之以義保之以義庶人章

用天之道節

案天子之孝人之所以參天地也庶人之孝人之所以異於禽獸也 諸葛武侯便宜十六策曰經云庶人之所好者所好者三字疑所謂孝者四字之譌唯躬耕勤苦謹身節用以養父母制之以財用之以禮豐年不奢凶年不儉素有積蓄以儲其後

故自天子至於庶人節

黃氏曰不敢毀傷孝之始也立身顯親孝之終也謹

身以事親則有始立身以事親則有終孝有終始則

道著於天下行立於百世敬愛其身而惡慢終之

身案

當爲始靡不有初鮮克有終終之實難且孩提愛親少長敬兄人固無不敬愛其始者放其良心則不能

終矣小則毀傷其身大則毀傷天下曾子曰旣患繇生

自纖纖也君子夙絕之夙絕之如何曰敬而已矣君

子未有不敬而免於患者也案聖人之道務在有

始有卒故周易首乾自强不息堯典始欽禮主於敬

論語首學而時習稱仁爲己任死而後已學本於有

恆化成於久道真積力久則強立不反政如農功日

夜以思思患豫防則身安而國家可保堯戒曰戰戰栗栗日愼一日詩曰我日斯邁而月斯征夙興夜寐無忝爾所生是以君子憂深思遠朝夕匪懈无有師保如臨父母惟恐百密一疏以釀家國莫大之禍以貽君親之憂失生民之望傳曰能者養以之福不能者敗以取禍是故君子勤禮小人盡力否則怠慢忘身禍災所聚唐明皇注此經不從鄭注訓患爲禍蓋驕泰之心已萌知得而不知喪阮氏福曰孔子於諸侯卿大夫士皆言然後能保其社稷宗廟祿位獨於天子庶人未言保守故於此總結言及於禍患五等

所同天子當防患及也明皇講此經不知患及天子之義似孔子論孝之時已豫括天寶之事所繫豈不大哉案聖人之訓炳若日月萬世治亂莫之能外卽今西國之所以能富能強亦不過上下情通同心協力有合於愛之義實事求是弗能弗措有合於敬之義故西學富強之本皆得我中學之一端中國之所以貧弱不在不知西學而在自失我中學聖人之道得其全者王得其偏者強有名而無實甚至背馳而充塞之者亡夫必實踐我中學而後可以治西學而後可以富強無患

三才章

夫孝天之經也地之義也民之行也

春秋繁露河間獻王問溫城董君曰孝經曰夫孝天之經地之義何謂也對曰天有五行木火土金水是也木生火火生土土生金金生水水爲冬金爲秋土爲季夏火爲夏木爲春春主生夏主長季夏主養秋主收冬主藏藏冬之所成也是故父之所生其子長之父之所長其子養之父之所養其子成之諸父所爲其子皆奉承而續行之不敢不致如父之意盡爲人之道也故五行者五行也由此觀之父授之子受

之乃天之道也故曰夫孝者天之經也此之謂也王
曰善哉天經旣得聞之矣願聞地之義對曰地出雲
爲雨起氣爲風風雨者地之所爲地不敢有其功名
必上之於天命若從天氣者故曰天風天雨也莫曰
地風地雨也勤勞在地名一歸於天非至有義其孰
能行此故下事上如地事天也可謂大忠矣土者火
之子也五行莫貴乎土土之於四時無所命者不與
火分功名木名春火名夏金名秋水名冬忠臣之義
孝子之行取之土土者五行最貴者也其義不可以
加矣五音莫貴於宮五味莫美於甘五色莫盛於黃

此謂孝者地之義也王曰善哉 案大哉乾元萬物
資始至哉坤元萬物資生元者天地之本萬物資之
以爲心所謂仁人心也孝爲仁之本元氣之最先見
者道之大原出於天天不變道亦不變故曰天之經
地順承天孝子之行忠臣之義取諸地故曰地之義
天地之經而民是則之則天之明因地之利以
順天下

鄭氏曰孝弟恭敬民皆樂之 案天地之元民實資
之乾以易知坤以簡能不學而能不慮而知故曰天
地之經而民是則之易則易知簡則易從易知則有

親易從則有功有親則可久有功則可大易簡而天下之理得故則天因地以順天下則人人親其親長其長而天下平明者天之所以命人者也孩提之童無不知愛其親天命之性生而知之因其性善而擴充之是謂則天之明利者地之所以養人者也君君臣臣父父子子則自天子至於庶人各保其天下國家身體髮膚以享土利是謂因地之利 又案天之明人之所以知愛知敬也地之利人之所以能愛能敬也利者義之和也卽順也地以至順承天則品物咸亨保合太和親親敬長則達之天下和睦無怨記

曰君明臣忠父慈子孝兄良弟弟夫義婦聽長惠幼
順謂之人義講信修睦謂之人利義利一也末有不
義而能利者 元氏曰此經全同左傳子太叔答趙
簡子問禮明孝之與禮其義同 阮氏福曰孝經則
字凡四見此章云而民是則之則天之明又聖治章
云民無則焉則而象之則字之義譬如繩尺規矩周
人最重之故左傳載公孫枝對秦伯曰唯則定國季
文子使史克對宣公引周禮曰則以觀德又引誓命
曰毀則爲賊

先王見教之可以化民也

見者先知先覺也則天因地以順天下以天治人也
見教之可以化民因其固有而利導之以人治人也
先之以博愛先之以敬讓以己治人也有諸己而後
求諸人以身教者從至誠而不動者未之有也 白
虎通曰教者效也上爲之下效之民有質樸不教不
成故孝經曰先王見教之可以化民

先之以博愛而民莫遺其親

博愛者本愛親之心以愛人民興於愛則惻然自動
其孩提愛親之心故莫遺其親博愛仁也未有仁而
遺其親者 漢書刑法志曰上聖卓然先行敬讓博

愛之德者眾心說而從之又曰仁愛德讓王道之本

陳之以德義而民興行

德若周禮三德六德義謂十義愛親之心德之本也
仁者仁此義者宜此忠者中此信者信此以爲君則
明以爲臣則忠以爲兄則良以爲弟則弟以爲長則
惠以爲幼則順無所處而不當也陳者張設布列之
意民旣動其愛親之心則可陳之以德義而百行立
矣

先之以敬讓而民不爭

元氏曰君身先行敬讓則天下自息貪競

示之以好惡而民知禁

禮記緇衣曰君民者章好以示民俗慎惡以禦民淫則民不惑矣鄭氏說以孝經曰示之以好惡而民知禁

孝治章

是以天下和平災害不生禍亂不作

阮氏曰此反覆申明首章民用和睦上下無怨之義自古民之怨秦怨隋極矣是以禍亂速作唐之天寶宋之新法亦皆怨而不和是以災害禍亂惟民心和睦者天下必久太平孔子之言厯厯明驗矣

聖治章

天地之性人爲貴

鄭氏曰貴其異於萬物也 董子曰天地之精所以
生物者莫貴於人人受命乎天也故超然有以倚物
疾疾莫能爲仁義惟人獨能爲仁義物疾疾莫能偶
天地惟人獨能偶天地人有三百六十節偶天之數
也形體骨肉偶地之厚也上有耳目聰明日月之象
也體有空竅理脈川谷之象也心有哀樂喜怒神氣
之類也觀人之體一何高物之甚而類於天也物旁
折取天之陰陽以生活耳而人乃爛然有其文理是

故凡物之形莫不伏從旁折天地而行人獨題直立
端尙正正當之是故所取天地少者旁折之所取天
地多者正當之此見人之絕於物而參天地又曰人
受命於天固超然異於羣生入有父子兄弟之親出
有君臣上下之誼會聚相遇則有耆老長幼之施粲
然有文以相接驩然有恩以相愛此人之所以貴也
生五穀以食之桑麻以衣之六畜以養之服牛乘馬
圈豹檻虎是其得天之靈貴於物也故孔子曰天地
之性人爲貴 阮氏曰孝經言天地之性人爲貴可
見人與物同受天性惟人有德行行首於孝所以爲

貴而物則無之也性字本從心從生先有生字後造性字商周古人造此字時卽以諸聲聲亦意也告子生之謂性一言本古訓而告子誤解古訓竟無人物善惡之分其意中竟欲以禽獸之生與人之生同論與孝經人爲貴之言大悖是以孟子闢之蓋人性雖有智愚然皆善者也 焦氏循說伏羲之畫卦曰情性之大莫若男女人之性孰不欲男女之有別也方人道未定不能自覺聖人以先覺覺之故不煩言而民已悟焉民知母不知父與禽獸同伏羲作八卦而民悟禽獸仍不悟也此人性之善所以異乎禽獸

案人性之善絕乎物而參天地者在知三綱五常孩提愛親五常之本別夫婦以正父子三綱之本聖人愛敬天下生養保全萬萬生靈之盛德大業皆從此出故曰人之行莫大於孝明王以孝治天下

孝莫大於嚴父嚴父莫大於配天則周公其人也

大孝尊親博施備物使天之所生地之所養祖父之所全付凡有血氣無不被我愛敬以萬國之歡心事其先王集天下之和氣升之郊廟而後爲無所毀傷而後孝之能事畢郊祀宗祀配以祖父此周公立人

倫之極爲制禮之本孝莫大於嚴父故周禮以尊尊
統親親萬世彝倫於是敘焉

故親生之膝下以養父母日嚴

親生之膝下者謂親身生之膝下以養父母日嚴者
以愛養父母日加嚴敬顧氏炎武曰孩提之童知愛
而已稍長然後知敬知敬然後能嚴子曰今之孝者
是謂能養至於犬馬皆能有養不敬何以別乎故雞
初鳴而衣服至於寢門外問衣燠寒疾痛苛癢而敬
抑搔之出入則或先或後而敬扶持之敬之始也詩
云戰戰兢兢如臨深淵如履薄冰而今而後吾知免

夫敬之終也日嚴者與日而俱進之謂

聖人因嚴以教敬因親以教愛

教卽禮也冠昏喪祭聘覲射鄉無一非因嚴教敬因親教愛讀孝經而後知禮之協乎天性順乎人情

父子之道天性也

此中庸性道教之義所自出性者生也天性猶云天生之膝下一體而分喘息呼吸氣通於親子之親嚴其父母天生自然所謂天命之謂性孟子所謂性善也天性親嚴是謂父子之道五倫皆從此起所謂率性之謂道天下之達道五也聖人因人親嚴之天

性而教之愛敬所謂修道之謂教也父子之道天性自誠明謂之性也因嚴教敬因親教愛自明誠謂之教也

君臣之義也

家人有嚴君焉父母之謂也人類有會歸而後人人得保其父子天下國家身體髮膚父傳之子受之上下各思永保其父子而後君臣各盡其道故父子之道爲君臣之義所自出故孝子事君必忠

父母生之續莫大焉君親臨之厚莫重焉

續猶屬也五服之親皆骨肉相連屬而父母生之一

體而分故續莫大焉長幼之施朋友之誼睦婣任恤
皆相厚之道而有父之親有君之尊生養教誨全付
有家永保勿替故厚莫重焉故愛敬他人必自愛親
敬親推之而聖人之德無以加於孝故親生之膝下
父母生之續莫
大焉漢書藝文志謂諸家說多
不安今反覆經義說之如此

故不愛其親而愛他人者節

左傳季文子使太史克數莒僕之罪以對宣公曰先
君周公制周禮曰則以觀德德以處事事以度功功
以食民作誓命曰毀則爲賊掩賊爲藏竊賄爲盜盜
器爲姦主藏之名賴姦之用爲大凶德有常無赦在

九刑不忘行父還觀莒僕莫可則也孝敬忠信爲吉
德盜賊藏姦爲凶德夫莒僕則其孝敬則弑君父矣
則其忠信則竊寶玉矣其人則盜賊也其器則姦兆
也保而利之則主藏也以訓則昏民無則焉不度於
善而皆在於凶德是以去之按史克述周公之訓以
正亂賊之罪孝經用其語此卽魯之春秋其文則史
而孔子取其義可見春秋孝經相輔爲教又可見孝
經明大順春秋誅大逆皆本於周公之則則法也至
德要道則天下順悖德悖禮則民無則此可見人性
之善好惡之同則以觀德者立父子君臣之則以觀

孝敬忠信之德有孝敬忠信之德則親親仁民愛物
相生相養相保之事功皆從此起未有事功不本於
德則者漢制使天下誦孝經東漢節義之所以盛國
本之所以固也曹操欲求不孝不弟汙辱之人而有
濟國安民之略者魏之所以遽見篡奪魏晉以後所
以數百年天下大亂綱常墜地生民塗炭所謂雖得
之君子不貴聖人之言豈不大彰明較著哉凡事之
不近人情者鮮不爲大姦慝不愛敬其親而愛敬他
人者豈真能愛敬他人哉將收拾人心要結死黨以
濟其大姦大惡其始誘以鉤餌其終納之湯火先爲

邪說淫辭以蠱惑迷亂人之心志而後使人忘其親
忘其身而從之如病風發狂蹈河掬火陷於悖逆誅
死之地而後已故墨翟之兼愛非兼愛也兼惡也其
無父也將以無君也彼其人有精明強忍之才博物
多能之學以兼愛之說招集徒黨設積日累久諸侯
稍衰將無事不可爲彼見君臣之義之出於父子也
於是先決父子之倫彼恐人之讀書知大義而不已
信也於是教人不讀書執斯之焚書以肆其凶虐曹
操之求不孝不弟之人以爲篡漢先聲皆此意也三
綱相須而成今日之爲邪說者又欲決夫婦之綱以

亂天下之父子以顛倒君臣則其智更奸其禍更速
矣夫人情莫不欲人之愛己聖人之愛人也以至誠
姦人之愛人也以大偽誠偽之別萬萬生靈生死之
關何以別之以其愛親與不愛親別之故孝經者仁
之至智之盡以孝經之道觀人視其所以觀其所由
察其所安人心之厚薄邪正不爽毫黍莊子曰盜不
得聖人之道不行爲之權衡以信之則并與權衡而
竊之夫苟以孝經爲權衡凶德之盜惡從而竊之哉
君子則不然節

春秋繁露曰衣服容貌者所以說目也聲音應對者

所以說耳也好惡去就者所以說心也故君子衣服中而容貌恭則曰說矣言理應對遠則耳說矣好仁厚而惡淺薄就善人而遠僻鄙則心說矣故曰行思可樂容止可觀此之謂也 鄭氏曰難進而盡忠易退而補過案難進者仕爲行道不爲利也天下惟難進者能盡忠熱中患失之鄙夫其於君也利之而已易退者以道事君不可則止也天下無不是之君親故思補過 阮氏曰此章兩言政字論語引書云孝子惟孝友于兄弟施于有政此政必從孝友而施卽孔子孝經之所由來猶之詩云民之秉彝好是懿德

爲孟子性善所由來孔孟之學未有不本之詩書者也

詩云淑人君子其儀不忒

阮氏曰晉唐人言性命者欲推之於身心最先之天商周人言性命者祇範之於容貌最近之地所謂威儀也春秋左傳襄公三十一年衛北宮文子見令尹圍之威儀言於衛侯曰令尹似君矣將有他志雖獲其志不能終也詩云靡不有初鮮克有終終之實難令尹其將不免公曰子何以知之對曰詩云敬慎威儀維民之則令尹無威儀民無則焉民所不則以在

民上不可以終公曰善哉何謂威儀對曰有威而可畏謂之威有儀而可象謂之儀君有君之威儀其臣畏而愛之則而象之故能有其國家令聞長世臣有臣之威儀其下畏而愛之故能守其官職保族宜家順是以下皆如是是以上下能相固也衛詩曰威儀棣棣不可選也言君臣上下父子兄弟內外大小皆有威儀也周詩曰朋友攸攝攝以威儀言朋友之道必相教訓以威儀也周書數文王之德曰大國畏其力小國懷其德言畏而愛之也詩云不識不知順帝之則言則而象之也紂囚文王七年諸侯皆從之囚

紂於是乎懼而歸之可謂愛之文王伐崇再駕而降
爲臣蠻夷帥服可謂畏之文王之功天下誦而歌舞
之可謂則之文王之行至今爲法可謂象之有威儀
也故君子在位可畏施舍可愛進退可度周旋可則
容止可觀作事可法德行可象聲氣可樂動作有文
言語有章以臨其下謂之有威儀也又成公十三年
曰成子受賑於社不敬劉子曰吾聞之民受天地之
中以生所謂命也是以有動作禮義威儀之則以定
命也能者養以之福不能者敗以取禍是故君子勤
禮小人盡力勤禮莫如致敬盡力莫如敦篤敬在養

神篤在守業國之大事在祀與戎祀有執燔戎有受
賑神之大節也今成子隋弃其命矣其不反乎觀此
二節其言最爲明顯書言威儀者二顧命自亂於威
儀酒誥用燕喪威儀詩三百篇中言威儀者十有七
朋友相攝以威儀已見於左氏所引此外敬慎威儀
維民之則威儀抑抑德音秩秩受福無疆四方之綱
抑抑威儀維德之隅敬慎威儀以近有德則皆同乎
北宮文子劉子之說也威儀者言行所自出故曰慎
爾出話無不柔嘉淑慎爾止不愆於儀此謂謹慎言
行柔嘉容色之人卽力威儀也是以仲山甫之德則

柔嘉維則令儀令色小心翼翼古訓是式威儀是力
矣魯侯之德則穆穆敬明敬慎威儀維民之則矣成
王之德則有孝有德四方爲則顓顓卬卬四方爲綱
矣且百行莫大於孝孝不可以情貌言也然詩曰敬
慎威儀維民之則靡有不孝自求伊祐矣又言威儀
孔時君子有孝子矣且力於威儀者可祈天命之福
故威儀抑抑爲四方之綱者受福無疆也威儀反反
者降福簡簡福祿來反也此能者養以之福也反是
則威儀不類者人之云亡矣威儀卒迷者喪亂蔑資
矣且定命卽所以保性卷阿之詩言性者三而繼之

曰如圭如璋令聞令望四方爲綱凡此威儀爲德之
隅性命所以各正也匪特詩也孔子實式威儀定命
之古訓矣故孝經曰君子言思可道行思可樂德義
可尊作事可法容止可觀進退可度以臨其民是以
其民畏而愛之則而象之故能成其德教而行其政
令詩云淑人君子其儀不忒論語曰君子不重則不
威學則不固此與詩左傳之大義無毫釐之差也阮
氏福曰曾子曰君子所貴乎道者三動容貌斯遠暴
慢矣正顏色斯近信矣出辭氣斯遠鄙倍矣亦曾子
傳孝經容止威儀之義也

卷中凡引阮文達公說自
首見外皆直稱阮氏其子

福則每引皆兼舉名以別之亦父前子名之義

案威儀所以定命不敢毀

傷自力威儀始凡人之目動言肆舉趾高心不固者

必有異事邪慮意外之憂凶悍好陵人者其後必有

非常之禍輕佻無度作事有始無終者其後多有天

折之患

四語得之吾友梁氏鼎芬

而家庭之間恣睢自由疾行先

長尤爲世道之大憂犯上作亂必自幼而不孫弟始

此語得之吾友沈氏曾植

故曲禮內則少儀爲平治天下之本其

爲父子兄弟足法而后民法之也詩曰威儀是力力

者躬行實踐之謂君子有其容則實以君子之德若

色取仁而行違則忒而非力矣

紀孝行章

孝子之事親也節

孝經孝之經也曲禮內則少儀文王世子之等皆孝之傳致敬致樂致憂若曲禮內則諸篇所言是元氏曰盡其憂謹之心侍疾必謹元氏以謹申憂甚善致哀致嚴若禮經士喪既夕特牲少牢及記檀弓喪服小記大傳祭義等篇是鄭氏說祭曰齋戒沐浴明發不寐齋必變食居必遷坐敬忌踧踖若親存也陸氏新語曰曾子孝於父母昏定晨省周寒溫適輕重勉之於糜粥之間行之於衽席之上而德美重於後

世按此之謂能事親

事親者居上不驕節

驕以致亡亂以致刑爭以致兵此之謂毀傷非是則
夭壽不貳修身以俟之命也所欲有甚於生者所惡
有甚於死者致命遂志殺身成仁義也是故驕也亂
也爭也雖幸而無患君子謂之毀傷所謂罔之生也
幸而免哀莫大於心死也不驕不亂不爭雖不幸而
死若比干之極諫孔父仇牧之死難君子謂之全歸
未見蹈仁而死者也蹈仁而死猶不死也以其無毀
傷之道也故曾子臨大節而不可奪

五刑章

五刑之屬三千而罪莫大於不孝

說文曰公不順忽出也从到子易曰突如其來如不孝子出不容於內也士卽易突字也案易曰突如其來如焚如死如鄭氏曰不孝之罪五刑莫大焚如殺其親之刑阮氏曰志在春秋爲弑君父者嚴刑法也行在孝經爲事君父者率性道也文言曰非一朝一夕之故其所由來者漸矣此易教兼春秋孝經言之也元氏曰舊注以不孝之罪聖人惡之去在三千條外周禮賈疏曰孝經不孝不在三千者深塞逆源

要君者無上非聖人者無法非孝者無親此大亂之道也

人生於三事之如一故天地者人之本祖父者類之本君師者治之本事親事君事師其義同大戴禮言大罪有五殺人爲下蓋殺人者所殘止一人自取誅戮而已要君非聖非孝則逆天悖理之極將驅天下爲禽獸以召禽獮草薶積血暴骨之禍故聖人必首誅之所以救同類於水火以至順討至逆迫於愛敬萬不得已之心而出之者也孔子誅少正卯誅亂臣賊子豈得已哉

廣要道章 廣至德章

此申明至德要道之義德者愛敬也愛敬及天下謂之至德孝弟是也孟子曰親親仁也敬長義也無他達之天下也德而曰至以言乎其大也道者所以行愛敬者也愛敬一人而千萬人說謂之要道禮樂是也孟子曰仁之實事親義之實從兄禮之實節文斯二者樂之實樂斯二者樂則生矣生則惡可已惡可已則不知足之蹈之手之舞之道而曰要以言乎莫此爲善也愛非敬不立愛親者不敢惡於人敬親者不敢慢於人不敢卽敬也故曰語孝必本敬本敬則

禮從此起孝弟同體父子之道君臣之義相須而成
孝則必弟孝則必忠孝以愛興敬禮以敬治愛古之
君子躬行至德自盡其孝弟忠敬以事父事兄事君
而卽以敬天下之爲父兄君者是之謂教以身教也
敬天下之爲父兄君者而天下之子弟臣皆惻然自
生其事父事君事兄之心是之謂悅悅卽樂則生矣
之樂所謂天地之經而民是則之孝弟恭敬民皆樂
之也天下之子弟臣悅則興孝興弟作忠而愛不可
勝用敬不可勝用尊尊親親長長幼幼以生以養以
富以教而上下安型仁講讓和親安平康樂而風俗

成矣故曰孝經者制作禮樂仁之本夫是之謂順
又案孔子行在孝經教孝教忠教弟而萬世之下皆
知父之爲父君之爲君兄之爲兄卽所以敬萬世之
爲君父兄者也萬世之爲子弟臣者讀孝經無不自
動其孝弟忠敬固有之良心所謂子悅弟悅臣悅也
子臣弟悅則本立道生親愛禮順之心生惡可已擴
而充之天下無亂不可治無散不可聚無弱不可強
故黃忠端之序孝經曰循是而行之五帝三王之治
猶可以復

移風易俗莫善於樂安上治民莫善於禮

禮記曰隆禮由禮謂之有方之士不隆禮不由禮謂之無方之民敬讓之道也故以奉宗廟則敬以入朝廷則貴賤有位以處室家則父子親兄弟和以處鄉里則長幼有序孔子曰安上治民莫善於禮此之謂也故朝覲之禮所以明君臣之義也聘問之禮所以使諸侯相尊敬也喪祭之禮所以明臣子之恩也鄉飲酒之禮所以明長幼之序也昏姻之禮所以明男女之別也夫禮禁亂之所繇生猶坊止水之所自來也故以舊坊爲無所用而壞之者必有水敗以舊禮爲無所用而去之者必有亂患故昏姻之禮廢則夫

婦之道苦而淫辟之罪多矣鄉飲酒之禮廢則長幼之序失而爭鬪之獄繁矣喪祭之禮廢則臣子之恩薄而倍死忘生者眾矣聘覲之禮廢則君臣之位失諸侯之行惡而倍畔侵陵之敗起矣故禮之教化也微其止邪也於未形使人日徙善遠罪而不自知也是以先王隆之也 白虎通曰樂以象天禮以法地人無不舍天地之氣有五常之性者故樂所以蕩滌反其邪惡也禮所以防淫佚節其侈靡也故孝經曰安上治民莫善於禮移風易俗莫善於樂 元氏曰樂記禮殊事而合敬樂異文而合愛敬愛之極是謂

要道神而明之是謂至德故必由斯人以宏斯教而後禮樂興焉政令行焉以盛德之訓傳於樂聲則感人深而風俗移易以盛德之化措之禮容則悅者眾而名教著明然則韶樂存於齊而民不爲之易周禮備於魯而君不獲其安亦政教失其極耳夫豈禮樂之咎乎 案此引申經義以論時政蓋明皇雖注孝經而不能躬行其道卒有天寶幸蜀之禍元氏見微知著故借說經以託規諷有慨乎其言之夫苟不至德至道不凝孔子篤行至孝德參天地躬備聖王之道爲禮樂之宗言爲世法行爲世道制作六藝宣教

明化以愛敬天下生民自天子至於庶人莫不畏而愛之則而象之是以崇聖之祀尊及五世衍聖之緒流慶萬年德爲聖人尊爲帝王師宗廟饗之子孫保之立身行道顯親揚名爲生民未有所謂行在孝經故大訓垂世日月並明曾子事親養志常以皓皓是以眉壽修身慎行忠實不欺患之小者毫髮必謹節之大者死生不奪故孔子以爲能通孝道授之業鄭君篤信好學守死善道進退容止非禮不行故依經立注爲學者宗若明皇之治有始無終禍亂僨興唐宗幾滅德不足以庇百姓言安足以闡名教所謂誦

詩三百授政不達雖多奚爲者今之士大夫飾虛喪
實靜言庸違視聖賢經傳徒爲沽名弋利之用自賊
以禍天下悲夫是以中庸貴誠論語惡佞

教以孝所以敬天下之爲人父者也教以弟所
以敬天下之爲人兄者也教以臣所以敬天下
之爲人君者也

禮文王世子記說世子齒學之禮曰國人觀之曰將
君我而與我齒讓何也曰有父在則禮然然而眾知
父子之道矣其二曰將君我而與我齒讓何也曰有
君在則禮然然而眾著於君臣之義也其三曰將君

我而與我齒讓何也曰長長也然而眾知長幼之節
矣故父在斯爲子君在斯爲之臣居子與臣之節所
以尊君親親也故學之爲父子焉學之爲君臣焉學
之爲長幼焉君臣父子長幼之道得而國治大傳曰
親親也尊尊也長長也此不可得與民變革者也義
皆與孝經同由世子齒學之義故自上至下皆兢兢
焉爲子臣弟少之事雖天子必有父必有兄不敢驕
溢非法以取亂亡所以天下和平兆民乂安也 又
案敬者禮之本也悅者樂之本也敬天下之父兄君
而天下之子弟臣悅禮樂之所由作也

廣揚名章

君子務本本立而道生其所厚者薄而其所薄者厚
未之有也故孝于惟孝友于兄弟卽施於有政曾子
曰未有君而忠臣可知者孝子之謂也未有長而順
下可知者第第之謂也未有治而能仕可知者先修
之謂也故曰孝子善事君第第善事長君子一孝一
悌可謂知終矣故孝經爲教忠之本人則孝出則第
卽可以守先王之道而垂法後世在上者之官人在
下者之取友亦視其家庭之間厚薄何如耳

居家理治可移於官

鄭氏曰君子所居則化

是以行成於內而名立於後世矣

黃氏曰君子之立行非以爲名也然而行立則名從之矣詩曰文王有聲適駿有聲周公之告召公曰丕單稱德皆不諱名也而今之君子則必以名爲諱故孝弟衰而忠順息居家不理治官無狀而猥享爵祿者眾也 顧氏炎武曰今人自束髮讀書之時所以勸之者不過所謂千鍾粟黃金屋而一旦服官卽求其所大欲君臣上下懷利以相接遂成風流不可復挽後之爲治者宜何術之操曰唯名可以勝之名之

所在上之所庸而忠信廉潔者顯榮於世名之所去
上之所擯而怙侈貪得者廢錮於家卽不無一二矯
僞之徒猶愈於肆然而懷利者南史有云漢世士務
修身故忠孝成俗至於乘軒服冕非此莫由晉宋以
來風衰義缺故昔人之言曰名教曰名節曰功名不
能使天下之人以義爲利而猶使之以名爲利雖非
純王之風亦可以救積污之俗矣又曰漢人以名爲
治故人材盛今人以法爲治故人材衰又曰宋范文
正上晏元獻書曰夫名教不崇則爲人君者謂堯舜
不足法桀紂不足畏爲人臣者謂八元不足尙四凶

不足恥天下豈復有善人乎人不愛名則聖人之權去矣案聖人正名百物善善而惡惡是是非非使天下灼然知善之爲善而力行之力行之而孝敬忠信之名歸焉身有盡而名無窮必使言爲世法動爲世道篤實輝光永久弗替而後立身行道爲無遺憾孝經曰行成於內而名立於後世行成於內者務其實不願乎外也論語曰君子疾沒世而名不稱疾其無爲善之實也是故日月有明人皆見之不求名而名自歸者上也乘燭幽室之中有求必見顧名而思義循名以致實者次也若夫不顧名義不恤公論

惟利是圖昏不知恥則民斯爲下其禍將使天下清濁淆亂邪慝並興反易天明決裂綱常而大亂起矣故名之所繫至大顧氏之言雖未及乎孝經揚名之義亦愛禮存羊剝極思復之苦心至論也

諫諍章

孝經大義在天子諸侯卿大夫士庶人各保其天下國家身名君有爭臣士有爭友父有爭子則雖有失道而不陷於兵刑亂亡故當不義則不可以不爭嗚呼臣子覩君父危亡將至而秦越相視不關痛癢朝廷之上唯諾泄沓持祿保位遂使蠻夷猾夏寇賊姦

究之禍日甚一日安危利藪欺飾如故至於河決魚爛淪胥以亡而後已此又與亂賊之甚者也 白虎

通曰臣所以有諫君之義何盡忠納誠也愛之能勿勞乎忠焉能勿誨乎 荀子曰孝子所以不從命有

三從命則親危不從命則親安孝子不從命乃衷從命則親辱不從命則親榮孝子不從命乃義從命則禽獸不從命則修飾孝子不從命乃敬故可以從而不從是不子也未可以從而從是不衷也明於從不從之義而能致恭敬忠信端慤以慎行之則可謂大孝矣 又說子貢以子從父命爲孝臣從君命爲貞

孔子曰昔萬乘之國有爭臣四人則封疆不削千乘之國有爭臣三人則社稷不危百乘之家有爭臣二人則宗廟不毀父有爭子不行無禮士有爭友不爲不義故子從父奚子孝臣從君奚臣貞審其所以從之之謂孝之謂貞也 案以上皆言臣子當諫爭之義 論語曰事父母幾諫見志不從又敬不違勞而不怨曾子曰父母之行若中道則從若不中道則諫諫而不用行之如由己從而不諫非孝也諫而不從亦非孝也孝子之諫達善而不敢爭辨爭辨者作亂之所由興也 白虎通曰人懷五常故諫有五其一

曰諷諫二曰順諫三曰闕諫四曰指諫五曰陷諫諷
諫者智也知患禍之萌深觀其事未彰而諷告焉此
智之性也順諫者仁也出辭遜順不逆君心此仁之
性也闕諫者禮也視君顏色不悅且卻悅則復前以
禮進退此禮之性也指諫者信也指者質也質指其
事而諫此信之性也陷諫者義也惻隱發於中直言
國之害勵志忘生爲君不避喪身此義之性也案
以上皆言臣子諫爭之禮五諫蓋因事之輕重而爲
之

此章極歎孝弟爲德之至蓋聖人之爲孝也必使天下盡被其愛敬而後孝德乃大必使萬世永被其愛敬而後孝德乃久王者父天母地孝於父母者以身存父母之神事死如生事亡如存必合萬國之歡心以事其先王使神罔時怨神罔時恫而後孝思乃盡孝於天地者以身立天地之心必使天之所生地之所養各得其所升中於天足以顯神明昭至德自天祐之吉无不利而後孝道乃備故曰郊社之禮所以事上帝也宗廟之禮所以事乎其先也明乎郊社之禮禘嘗之義治國其如示諸掌乎夫天道遠人道邇

行遠自邇守約施博德極於神明彰而不外事父母之孝化極於上下治而不外長幼之順信乎夫孝天之經也地之義也人人親其親長其長而天下平堯舜之道孝弟而已 事天明者尊之至也事地察者親之至也孝莫大於嚴父繼人之志述人之事凡父所爲子無不奉承而敬行之不敢不致如父之意推此以事天用天之道以道民通神明之德類萬物之情合天下愛敬之心以尊天是謂事天明資於事父以事母而愛同樂其心不違其志樂其耳目安其寢處以其飲食忠養之推此以事地因地之利以利民

養其欲給其求樹木以時伐禽獸以時殺致天下愛敬之力以報地是謂事地察 禮記孔子曰仁人之事親也如事天事天如事親鄭氏說以此經案事天事親皆歸於盡愛敬不毀傷而已 又案鬼神之說儒釋各家互爭惟聖人之言中正無弊得乎人心之所同安禮記曰氣也者神之盛也魄也者鬼之盛也合鬼與神教之至也眾生必死死必歸土此之爲鬼骨肉斃於下陰爲野土其氣發揚於上爲昭明焄蒿悽愴此百物之精也神之著也聖人之言鬼神也如是孝經曰事父孝故事天明事母孝故事地察天地

明察神明彰矣宗廟致敬鬼神著矣又曰春秋祭祀以時思之禮記曰惟聖人爲能饗帝孝子爲能饗親饗者鄉也鄉之然後能饗也聖人之事鬼神也如是論語曰未能事人焉能事鬼傳曰聖王先成民而後致力於神又曰國將興聽於民將亡聽於神神聰明正直而壹者也依人而行聖人之務民義而不瀆鬼神也如是蓋氣也者神之盛天有日月星辰地有山川邱陵皆積氣成形則必有神以宰之形神合則爲人形神離則爲鬼魂氣歸天而祖考與子孫喘息呼吸精氣相通苟有子孫則其神必馮依之而不遽散

其先有功德後世賴其功思其人者其神亦必依之
而常存故天有神地有祇人有鬼雖視之不見聽之
不聞而其理固平易可得而質言也神與人異道聖
人之爲祭祀也非曰神嗜飲食也以爲萬物本天人
本乎祖報本反始時思追養通其精誠於神明因以
教天下順天事親以立愛敬之本也神與人異職聖
人之言禍福也曰神福仁而禍淫曰求福不回曰自
求多福禍福無不自己求之者仁則榮不仁則辱國
家明其政刑則莫敢侮之般樂怠敖則自求禍故聽
於民者必興聽於神者必亡又曰賢者之祭必受其

福非世所謂福也福者備也備者百順之名也無所
不順之謂備彼詔瀆鬼神以求福者其流入於左道
亂政蔑視鬼神爲無知者其流至於悖逆不順二者
相反相因蓋瀆鬼神者其心徒爲徼福求利本不知
有天人之理本不出於敬天愛親之誠其畏父兄也
不若其畏鬼神其信聖經也不若其信釋氏故邪說
左道易以惑而一反之則敢於慢天忍於忘親犯上
作亂相因而至矣苟知孝經之教則安有溺於虛無
以誤家國悖於倫理以陷逆亂之患哉

父子之道天性也君臣之義也以孝事君則忠故孝
子之事君也如事親至誠惻怛善惡吉凶視爲切身
公家之利知無不爲竭力盡能自知不足其陳善納
誨一以悱惻忠厚出之其愛國也至故其謀國也審
其愛君也誠故其告君也明因勢利導先事豫防萬
不忍以唯諾誤人家國亦不忍以毫末意氣激成朋
黨釀成事變殺身非痛負國爲痛深思熟計必求有
濟故事君之敬皆出於愛上下相親則君臣同慶夫
子此章立萬世人臣之極其言婉篤誠懇本孝而出
後世大臣惟諸葛武侯陸宣公諸人近之學而入政

移孝作忠者所當深體味也 三國吳志張昭傳孫
權嘗問衛尉嚴峻寧念小時所聞書不峻因誦孝經
仲尼居昭曰嚴峻鄙生臣請爲陛下誦之乃誦君子
之事上咸以昭爲知所誦

喪親章

曾子讀喪禮泣下沾襟經解曰喪祭之禮所以明臣
子之恩也盛德記曰凡不孝生於不仁愛也不仁愛
生於喪祭之禮不明喪祭之禮所以教仁愛也致愛
故能致喪祭春秋祭祀之不絕致思慕之心也夫祭
祀致饋養之道也死且思慕饋養況於生而存乎故

曰喪祭之禮明則民孝矣故有不孝之獄則飾喪祭之禮也曾子曰人之生也百歲之中有疾病焉有老幼焉故君子思其不可復者而先施焉親戚既沒雖欲孝誰爲孝年既耆艾雖欲弟誰爲弟故孝有不及弟有不時其此之謂與故喪禮者聖人爲中道失母之嬰兒立中制節而卽爲朝露未晞暫依膝下者動喜懼愛日之誠讀孝經喪親章禮喪祭諸篇而不動心者必無此人後世廢棄不讀是以人心日薄孝道日衰而犯上作亂之禍易起喪服四制曰高宗卽位而慈良於喪當此之時殷衰而復興禮廢而復起春

秋傳說魯昭公居喪而不哀在戚而有嘉容君子是以知其不能終天下國家之治亂有不根於本原之厚薄者哉 此章爲喪禮提綱禮士喪既夕士虞記問喪等篇皆其目也喪禮事死有二大端一以奉體魄一以事精神爲之棺槨衣衾而舉之奉體魄之始陳其簠簋而哀感之事精神之始擗踊哭泣哀以送之卜其宅兆而安厝之奉體魄之終爲之宗廟以鬼享之春秋祭祀以時思之事精神之終也

毀不滅性

鄭氏曰毀瘠羸瘦孝子有之 按不滅性者亦不敢

毀傷之義孝子喪親惻怛之心痛疾之意傷腎乾肝焦肺特以父母生己不敢毀滅耳

喪不過三年

鄭氏曰三年之喪天下達禮案不過者不足之辭人於其親也至死不窮特先王制禮不敢過耳

陳其簠簋而哀感之

鄭氏曰陳奠素器而不見親故哀感也

爲之宗廟以鬼享之

鄭氏曰宗尊也廟貌也親雖亡沒事之若生爲立宮室四時祭之若見鬼神之容貌

春秋祭祀以時思之

鄭氏曰四時變易物有成熟將欲食之先薦先祖念之若生不忘親也

生事愛敬死事哀感生民之本盡矣死生之義備矣孝子之事親終矣

鄭氏曰尋繹天經地義究竟人情也行畢孝成案君子有終身之喪忌日之謂也孝子之身終終身也者非終父母之身終其身也父母既沒慎行其身不遺父母惡名可謂能終矣